

摘藻堂四庫全書薈要

史部

欽定四庫全書薈要卷六千五百三十

史部

元史卷一百五十一

明翰林學士亞中大夫知制誥兼修國史宋濂等修

列傳第三十八

薛塔喇海

薛塔喇海燕人也剛勇有志歲甲戌太祖引兵至北口塔喇海率所部三百餘人來歸帝命佩金符為礮水手元帥屢有功進金紫光祿大夫佩虎符為礮水手軍民

諸色人匠都元帥便宜行事從征回回河西欽察輝和爾喀喇柰曼阿勒呼木呼察都哩木薩蘭諸國俱以礮立功太宗三年睿宗引兵自洛陽渡河塔喇海由隴右假道金商遂會師于鈞州三峰山敗金師四年破南京及唐鄧鈞許諸州取鄆陵扶溝四月卒子達實拉襲為都元帥南攻江淮有功歲庚戌卒弟結桑襲憲宗八年從世祖攻鈞魚山苦竹崖大林平青居山破重慶馬湖天水賜以白金鞍馬等物中統三年李璫叛濟南又

以礮破其城至元五年從圍襄陽三月卒丞相阿珠欲以千戶劉添喜攝帥府事子四嘉努年方十六請從軍自効帝壯而許之八年始襲父爵十年冬十二月襄樊未下四嘉努立礮攻之明年正月襄陽守呂文煥降繼從丞相巴延南伐十月至郢州先登師既渡江四嘉努自鄭州下沿海諸城堡至建康十二年授武節將軍六月與宋將夏貴戰于峪溪口奪其船二百餘艘十一月屠常州十二月取蘇州十三年攻鎮巢七月圍揚州守

臣李庭芝棄城走追獲之九月進階懷遠將軍將兵平浙東諸郡從征福建灤江與宋兵力戰破之獲戰艦千餘艘十六年進階鎮國將軍鎮揚州二十二年改為萬戶

高諾爾

高諾爾女直人事太祖從征西域復從糾綽太子察罕諾延連歲出征累有功授金符總管管領山前十路匠軍歲已未憲宗憫其老命其子元長襲其職從世祖渡

江攻鄂還鎮隨州至元二年移鎮季陽五年從元帥阿珠修立白河口新城鹿門山等處城堡圍襄樊七年充季陽軍馬總管十年從攻樊城先登十一年從渡江鼓戰艦上流與宋人戰殺三百餘人奪其船及鎧仗以功賜虎符陞宣武將軍進兵丁家洲與宋臣孫虎臣等大戰殺五百餘人奪其船及鎧仗無算敗夏貴于焦湖從征常州先登又攻杭州宋平護送宋太后至京師以功進懷遠大將軍萬戶二十一年領軍二千從太子托歡

征交趾追襲交趾世子于大海口奪其戰艦以還二十三年陞安遠大將軍季陽萬戶府萬戶是年夏復以兵追襲交趾世子于海之三义口與敵軍合戰中毒矢而死子默爾根初直宿衛襲父職領兵鎮廣東尋移戍惠州平盜譚大猷朱珍等元貞元年移戍袁州盜陀頭以衆犯境悉勦除之尋廣之南恩盜起復領兵平之還没于袁州贈懷遠大將軍季陽萬戶府萬戶輕車都尉渤海郡侯

王義

王義字宜之真定寧晉人家世業農義有膽智沈默寡言讀書知大義金人遷汴河朔盜起縣人聚而謀曰時事如此吾儕欲保全家室宜有所統屬乃相與推義為長攝行縣事尋號為都統太師國王穆呼哩兵至城下義率衆以寧晉歸焉入覲太祖賜駿馬二匹授寧晉令兼趙州以南招撫使是時兵亂民廢農耕所在人相食寧晉東有藪澤周回百餘里中有小堡曰瀝城義曰瀝



城雖小而完且有魚蘊菱芡之利不可失也留偏將李直守寧晉身率衆保瀝城由是全活者衆歲乙亥金將李伯祥據趙州穆呼哩遣義擣其城會天大風雨義帥壯士挾長梯疾趨夜四鼓四面齊登殺守埤者城中亂伯祥挺身走天壇寨一州遂定穆呼哩承制授義趙州太守趙冀二州招撫使丁丑大軍南取鉅鹿洺州二城還軍至唐陽西九門遇金監軍納蘭率冀州節度使柴茂等將兵萬餘北行義伏兵桑林先以百騎挑之納蘭

趨來迎戰因稍却誘之近桑林伏起金兵大亂奔還獲  
納蘭二弟及萬戶李虎戊寅拔東鹿進攻深州守帥以  
城降順天都元帥張柔上其功陞深州節度使深冀趙  
三州招撫使金將武仙以兵四萬來攻東鹿仙諭軍士  
曰東鹿兵少無糧城無樓櫓一日可拔也盡銳來攻義  
隨機應拒積三十日不能下大小數十戰皆捷一夕義  
召將佐曰今城守雖有餘然外無援兵糧食將盡豈可  
坐而待斃椎牛饗士率精銳三千銜枚夜出直擣仙營

仙軍亂乘暗攻之殺數千人仙率餘衆遁還真定悉獲其軍資器仗穆呼哩聞之遣使送銀牌十命義賜有功者庚辰拔冀州獲柴茂械送軍前穆呼哩張柔復上其功授龍虎衛上將軍武安軍節度使行深冀二州元帥府事賜金虎符辛巳仙復遣其將盧秀李伯祥率兵謀襲趙州并取滏城率戰艦數百艘沿江而下義具舟楫於紀家莊截其下流邀擊之義士卒皆水鄉人善水戰回旋開闔往來如風雨船接則躍登彼船奮戈疾擊敵

莫能當殺千餘人擒秀伯祥退保瀝城義引兵拔之伯祥西走二子死焉邢州盜號趙大王聚衆數千據任縣固城水寨真定史天澤集諸道兵攻之不能下甲午義引兵薄其城一鼓下之獲趙大王侯縣令等數人殺之餘黨悉平義乃布教令招集散亡勸率種藝深冀之間遂為樂土云

王玉 子忱附

王玉趙州寧晉人長身駢脅多力金季為萬戶鎮趙州

太師國王穆呼哩下中原玉率衆來附領本部軍從攻  
邢洺磁三州濟南諸郡號長漢萬戶從攻澤潞諸州獨  
潞州堅壁不下玉力戰流矢中左目竟拔其城又破平  
陽下太原汾代等州師還署元帥府監軍以趙州四十  
餘寨隸焉先是金將武仙既降復叛殺元帥史天倪宋  
彭義斌在大名陰與仙合玉從實納岱史天澤攻敗武  
仙生擒義斌駐軍寧晉東里寨仙遣人齎誥命誘玉妻  
妻拒曰妾豈可使夫懷二心於國家耶仙圍之數匝殺

其子寧壽玉聞之領數騎突其圍斬獲數百人而還仙遣人追之不敢進皆曰王將軍膽氣驍雄我輩非敵也仙乃盡發玉先世二十七冢棄骸滿道玉從史天澤諸將擊仙於趙州仙糧絕走雙門寨圍之會大風仙獨脫走斬其將四十三人真定遂平加定遠將軍權真定五路萬戶假趙州慶源軍節度副使有民負西域賈人銀倍其母不能償玉出銀五千兩代償之又出家奴二百餘口為良民中統元年二月卒年七十子忱

忱字允中幼讀書明敏有才識平章趙壁引見裕宗潛  
邸語稱旨命宿衛掌錢穀計簿授山北遼東道提刑按  
察司副使駙馬博和哩數馳獵蹂民田忱以法繩之憲  
吏耿熙言徵北京宣慰司積欠逋負計可得鈔二十萬  
錠帝遣使覈實熙懼事露擅增制語有并打算大小一  
切諸衙門等事十二字追繫官吏至數百餘人忱驗問  
知其詐熙乃歛服裕宗薨于潛邸忱建言陛下春秋高  
當早建儲嗣平章博果密以聞帝嘉納焉改河北河南

道提刑按察副使忱以江南人鬻子北方名為養子實為奴也乞禁之又省部以正軍餘田出調發忱言士卒衝冒寒暑遠涉江海宜加優恤皆從之潁州朱喜嘗俘於兵既自贖主家利其貲復欲以為奴又有誣息州汪清為奴殺而奪其妻子及田宅者獄久不決忱皆正之劾罷鎮南帥唐古特唐古特結援大臣誣奏于帝繫忱至京師得面陳其事世祖大悟抵唐古特罪按察司改廉訪司起忱為燕南河北道肅政廉訪副使累遷嶺南



廣西河東山西兩道肅政廉訪使江陵汴梁兩路總管  
至大三年拜中奉大夫雲南行省參知政事未行卒

趙迪

趙迪真定藁城人也幼孤事母孝多力善騎射金末為  
義軍萬戶郡將出六鈞强弩立賞募能挽者迪能之即  
署真定尉遷藁城尉陞為丞太祖兵至藁城迪率衆迎  
降歲壬午改藁城為永安軍以迪同知節度使事嘗從  
帝西征他將校豪橫俘掠獨迪治軍嚴所過無犯先是

真定既破迪亟索橐城人在城中者共得男女千餘人  
諸將欲分取之迪曰是皆我所掠當以歸我諸將許諾  
迪乃召其人謂曰吾懼若屬為他將所得則分奴之矣  
故索以歸之我今縱汝往以各遂生產為良民衆感泣  
而去時兵荒之餘骸骨蔽野迪為大冢收瘞壬子歲卒  
年七十子七人椿齡真定路轉運使

邸順 弟琮附

邸順保定行唐人占籍於曲陽縣金末盜起順會諸族

集鄉人豪壯數百人與其弟常築兩砦于石城玄保分據以守歲甲戌率衆來歸太祖授行唐令丙子真定饑羣盜據城叛民皆穴地以避之盜發地而噉其人順擒數百人殺之朝廷陞曲陽為恒州以順為安撫使金將武仙據真定帥衆來攻順與戰大敗之賜金虎符加鎮國上將軍恒州等處都元帥庚辰武仙屯兵于黃堯兩山順及弟常又擊敗之時西京郝道章陰結武仙抄掠州縣順擒道章殺之仙退真定以自保順從穆呼哩攻

之敗之於王柳口仙遂棄真定南走以功賜順名察納  
格爾陞驃騎衛上將軍充山前都元帥弟常賜名濟農  
格爾辛卯春從太宗攻河南諸郡招降民十餘萬以順  
知中山府己亥佩金符為行軍萬戶管領諸路元差軍  
五千人從大軍破歸德府留順戍之丁未駐師五河口  
宋兵夜襲營順掩殺其衆生獲十五人癸丑攻連水甲  
寅舉部屬蕭薩巴納琳之功以奏上賜蕭薩巴納琳金  
銀符仍隸麾下丙辰春順卒年七十四子浹襲職己未

從世祖渡江圍鄂州有戰功中統元年世祖即位決以所部張宣等十二人奏聞于朝遂以金銀符賜之三年圍李璫還守息州至元十一年賜虎符授金州招討副使後又遷懷遠大將軍金州萬戶十三年改襄陽管軍萬戶三月以樞密院奏行淮西總管萬戶府事守廬州十四年移龍興仍管領本翼軍人十五年復為管軍萬戶攻贛州崖石寨太平岩賊有功十七年陞鎮國上將軍都元帥鎮龍興諸路兼管本萬戶府事賜銀印吉贛

盜起行省遷元帥府以鎮之二十一年元帥府罷復為  
萬戶二十三年佩元降虎符為歸德萬戶鎮守吉安未  
幾統領江西各萬戶集兵七千戍廣東凡二載大德三  
年卒年七十七贈輔國上將軍北庭元帥府都元帥護  
軍追封高陽郡公諡襄敏子榮仁襲佩其虎符為宣武  
將軍歸德萬戶鎮廣東惠州感瘴疾不任事子貫襲貫  
卒子士忠襲士忠卒子文襲順族弟琮

琮太祖時從族兄行唐元帥常來降歲乙酉金降將武

仙復據真定叛琮敗之于黃臺癸巳從元帥布展滅金于蔡有功真定五路萬戶選充總管府推官尋奉旨賜金符授管軍總押管領七路兵馬鎮徐州宋兵入境琮戰却之己亥從大將察罕攻滁州力戰流矢中臍明年卒子澤襲移鎮潁州宋兵攻潁澤戰敗之至元四年從元帥阿珠克平塞寨及老鷄山十一年從沙洋奪六艦皆論功受賞有差十二年授武德將軍管軍總管從攻潭州及靜江累官懷遠大將軍管軍萬戶郴州路總管

府達嚕嚕齊二十二年改授廬州蒙古漢軍萬戶尋遷  
潁州翼會徽州績溪縣盜起澤討平之二十八年移鎮  
杭州卒子元謙襲為潁州萬戶元謙卒子祺襲祺卒子  
忠襲

王善 子慶端附

王善字子善真定藁城人父增監本縣酒務以孝行稱  
善資儀雄偉其音若鐘多智略尤精騎射金貞祐播遷  
田疇荒蕪人無所得食善求食以奉母歲乙亥羣盜蜂



起衆推善為長善約束有法備禦有方盜不能犯擢本  
縣主簿戊寅權中山府治中時武仙鎮真定陰蓄異志  
忌善威名密令知府李濟府判郭安圖之己卯秋濟安  
張宴伏兵召善計事善覺即還治衆倉卒得八十人慷  
慨與盟人爭自奮遂誅濟安乃諭其黨曰造孽者李郭  
耳餘無問善夜臥北城上戒麾下曰勿以我累汝家當  
取吾首獻帥府衆曰公何為出此言我輩惟有効死而  
已遂率衆來歸授金符同知中山府事是年冬以兵三

百攻武仙仙遣將率精銳二千拒戰善擒斬之仙走獲  
鹿委其佐段琛城守復戰拔之入據其城軍勢大振自  
中山以南降州郡四十二庚辰遷中山真定等路招討  
使尋加右副元帥驃騎大將軍屯藁城壬午陞藁城為  
匡國軍以善行帥府事癸未進金吾衛大將軍左副元  
帥仙窮迫請降詔命復舊鎮善奏仙狼子野心終必反  
覆請修城隍備之未幾仙果叛率衆來攻火及西門善  
出戰却之仙使其部下宋元俘老幼四千人南奔善追

奪之俾復故業仙自是不敢復入真定其部曲多來降  
丙戌以功賜金虎符仍行帥府事壬辰從征河南至鄭  
州州將馬伯堅素聞善名登埤大呼曰藁城王元帥在  
軍中否願以城降之善直前免胄與語伯堅果率衆出  
降善令軍中秋毫無犯民皆按堵願從善北渡者以萬  
計授之土田以安集之丙申兼河北西路兵馬副都總  
管辛丑授知中山府事屬縣新樂地居衝要迎送供給  
倍於他縣皆取於民善均其勞逸所徵或未給輒出家

貲代輸民德之又放家僮五百人為民咸懷其德癸卯  
卒年六十一皇慶元年贈銀青榮祿大夫司徒追封冀  
國公諡武靖子慶淵為行軍千戶征淮南死次慶端  
慶端字正甫初為郡筦庫進水軍提領訓練士卒常如  
臨敵敗李壇於老僧口以功佩金符為千戶監築大都  
城移戍清口宋兵來攻守將戰死城欲陷慶端拔刀誓  
衆裹創力戰城得以全羣盜四起復擊走之進武節將  
軍管軍總管領左右中衛兵從世祖北征還遷右親軍

副都指揮使進侍衛軍都指揮使建威武營以處衛兵  
經畫田廬使各安業別立神鋒軍親教以蹶張弩技作  
整暇堂屏利局浚渠構室如治家事至元十九年改詹  
事丞時有司欲就威武貸粟數萬石濟饑民裕宗在東  
宮以問慶端慶端對曰兵民等耳何間焉即請與之帝  
嘗遣近侍夜出伺察為邏卒所執近侍以實告卒曰軍  
中惟知將軍令不知其他近侍以聞帝賞以黑貂裘及  
親征納延命慶端以所部從時年六十餘與士卒同甘

苦畫則擐甲執兵迎敵夜臥不解衣暇則俾士卒為軍  
市自相懋遷征東之功慶端贊畫居多成宗即位論翼  
戴功拜金吾衛上將軍中書左丞行徽政副使兼隆福  
宮左都威衛使進階資德大夫大德二年加榮祿大夫  
平章政事僉書樞密院事兼使如故以疾卒

杜豐

杜豐字唐臣汾州西河人父珪以積德好施鄉稱善人  
豐少有大志倜儻不羈通兵法仕金為平遥義軍穆昆

佩銀符太祖取太原豐率所部來降皇舅昂吉諾延授  
兵馬都提控從國王安扎爾攻平陽先登克絳州解州  
諸堡招集流民三萬餘家以功賜金虎符陞征行元帥  
左監軍金人南遁遂以豐守河北歲庚辰上黨張開以  
萬衆寇汾州豐率精騎五千敗之從國王鄂齊爾下懷  
孟破溫谷木澗等寨輒先登攻洪洞西山斬首六百餘  
級攻松平山破之賊墮崖死以萬計獲生口甚衆金將  
武仙等往來鈔掠平陽太原間行路梗塞壬午授豐龍

虎衛上將軍河東南北路兵馬都元帥便宜行事遂破  
玉女割渠等寨俘獲千餘人丙戌從昂吉諾延攻益都  
金守將突圍出豐戰扼之斬首千級捕虜二十人益都  
下遂畧地登萊降島民萬餘己丑以本部取沁州由是  
銅鞮武鄉襄垣綿山沁源諸縣皆下辛卯命豐撫定平  
陽太原真定及遼沁未降山寨皆平之乙未陞沁州長  
官長官者國初高爵也在沁十餘年寬繇薄賦勸課農  
桑民以富足丁未請老丙辰疾卒于家年六十有七沁



人立祠歲時祀焉子三人思明思忠思敬思敬事世祖  
潛邸由平陽路同知累遷治書侍御史阿哈瑪特敗臺  
臣皆罷去思敬以帝所眷知獨留出為安西路總管僉  
陝西行省事歷汴梁總管再入中臺為侍御史時僧格  
以罪誅風紀為之振肅未幾拜參知政事改四川行省  
左丞不赴陞中書左丞致仕年八十六卒謚文定

舒穆魯拜達勒

舒穆魯拜達勒契丹人父托雅爾從霸州拜達勒仕金

為霸州平曲水寨管民官太師國王穆呼哩率師至霸  
州拜達勒迎降穆呼哩察其智勇竒之擢為千戶歲甲  
戌從穆呼哩覲太祖於雄州佩以銀符充漢軍都統帝  
次牛闌山欲盡戮漢軍穆呼哩以拜達勒可用奏釋之  
因請隸麾下從平高州乙亥授左監軍佩金符與北京  
都元帥烏頁爾分領錦州紅羅山北京東路漢軍二萬  
又從多果朗實里巴徇地山東大名比至洺州城守甚  
堅師不得進拜達勒不避矢石率衆先登遂拔之丁丑

從平益都沂密萊淄戊寅從定太原忻代平陽吉隰岢  
嵐汾石絳州河中路澤遼沁辛巳穆呼哩承制陞拜達  
勒為龍虎衛上將軍霸州等路元帥佩金虎符以黑軍  
鎮守固安水寨既至今令兵士屯田且耕且戰披荆棘立  
廬舍數年之間城市悉完為燕京外蔽庚寅朝太宗于  
行在所賜金符辛卯從國王塔斯征河南癸巳從討萬  
努於遼東平之拜達勒始從征伐及後為將大小百戰  
所至有功年七十以疾卒于官子奇扎爾察察哩

賈塔爾琿

賈塔爾琿冀州人太祖用兵中原募能用礮者籍為兵授塔爾琿四路總押佩金符以將之及攻益都下之加龍虎衛上將軍行元帥左監軍便宜行事師還駐謙謙州即古烏孫國也歲己丑將所部及契丹女直唐古漢兵攻鄂托羅爾城塔爾琿督諸軍穴城先入破之即軍中拜元帥改銀青光祿大夫從睿宗入散關畧關外四州經興元渡漢江畧唐鄧申裕諸州鼓行而東河南平

陞金紫光祿大夫總領都元帥從大帥塔沁攻徐邳平  
之十六年卒子緯爾齊襲從諸王伊遜克塔齊爾南  
征戊午卒于軍子吉魯襲卒第六十八襲至元五年諸  
軍圍襄樊九年六十八帥所部戍駱駝嶺一字城立礮  
樊城南不發以怠敵心俄帥銳卒突出攻其城西破之  
以功賜銀幣鞍馬弓矢十一年諸軍南征渡江明年加  
宣武將軍宋常州守臣姚訔堅守不下六十八發礮摧  
其城壁以納諸軍宋援兵突至力戰却之常州既克帥

府令總新附礮手軍臨安降加懷遠大將軍從諸軍追  
宋二王至海下三十餘城十四年加昭勇大將軍十五  
年領南軍精銳者入衛加輔國上將軍十八年論功授  
奉國上將軍管領礮手軍都元帥二十年罷都元帥更  
授礮手軍匠萬戶佩三珠虎符二十六年卒

鄂屯世英

鄂屯世英女真人也其先世仕金為淄州刺史歲癸酉  
太祖兵下山東淄州民奉世英及弟保和迎降皆授以

萬戶世英個儻有武畧由萬戶遷德興府尹時金經畧使苗道潤率衆欲復山西世英與戰克之將盡殺所俘其母責之曰汝華族也畏死而降此卒伍爾驅之使戰何忍殺之耶遂止世英從數騎巡部定襄卒于軍保和由萬戶陞昭勇大將軍德興府元帥錫虎符改雄州總管尋以元帥領真定保定順德諸道農事凡闢田二十餘萬畝改真定路勸農使兼領諸署賜居第戎器裘馬給戶食其租年五十六致仕保和四子希愷希元希魯

希尹希愷襲勸農使皇太后錫以錦服曰無墜汝世業  
郡縣有水旱必力請蠲租調民賴之南征時置軍儲倉  
于汴衛歲輸河北諸路粟以實之分冬月三限失終限  
者死吏徵斂舞法民甚苦之希愷知其弊蠲煩苛而民  
不擾尋以勸農使兼知冀州希愷至為束約健訟之俗  
為變蒙古軍取民田牧久不歸希愷悉奪歸之軍無怨  
言至元二年遷順天治中三月改順德又踰月陞知河  
中府秩滿歸調時阿哈瑪特專政官以賄成希愷不往



見降武德將軍知景州數月卒希元彰德漕運使希  
魯澧州路總管希尹中統三年李璫叛濟南世祖命丞  
相史天澤討之希尹謁天澤面陳利害願擊賊自効試  
其騎射壯之命充真定路行軍千戶與賊戰矢無虛發  
賊敗走入城中諸王哈必齊賞銀五十兩希尹請築外  
城圍之深溝高壘俟其糧絕不戰而坐待其困天澤從  
之璫既就擒至元十一年樞密錄其功自右衛經歷六  
遷至同知廣東道宣慰司事卒

田雄

田雄字毅英北京人也幼孤能樹立以驍勇善騎射知名金末署軍都統歲辛未太祖軍至北京雄率衆出降太祖以雄隸太師國王穆呼哩麾下從征興中廣寧諸郡定府州縣二十有九平錦州張鯨兄弟之亂從攻柏鄉邢相辛巳從攻廊坊綏葭諸州有功穆呼哩承制授雄隰吉州刺史兼鎮戎軍節度使行都元帥府事平汾西霍山諸柵壬午以穆呼哩命授河中帥聽石天應節

制太宗時從攻西和興元諸州又從攻夔萬諸州論功尤最賜金符授行軍千戶召為御前先鋒頃之使攻破楨州雷家堡奉旨召納河南降附得戶十三萬七千有奇民皆按堵而別部將校縱兵虜掠民惶懼悔降雄力為救護至出已財與之民得免於害癸巳授鎮撫陝西總管京兆等路事時關中苦於兵革郡縣蕭然雄披荆棘立官府開陳禍福招徠四山堡砦之未降者獲其人皆慰遣之由是來附者日衆雄乃教民力田京兆大治

事聞賜金符定宗時入覲于和林以疾卒年五十八後  
追封西秦王子八人大明襲職知京兆等路都總管府  
事

張巴圖

張巴圖昌平人歲辛未太祖南征巴圖率衆來附願為  
前驅遂留備宿衛從近臣呼圖克西征回紇河西諸蕃  
道隴蜀入洛屢戰流矢中頰不少却帝聞而壯之賜名  
巴圖自是呼圖克亦專任之甲午金亡以呼圖克為礮

手諸色軍民人匠都元帥守真定呼圖克卒無子以巴

圖代之及呼圖克兄子沙克善少長巴圖請於朝歸

政而終老焉子蒙古台從憲宗攻蜀釣魚山苦竹二壘

冒犯矢石屢挫而不沮遂以勇敢聞中統元年賜銀符

預議礮手軍府事尋易金符為行軍千戶從征襄樊有

功卒子世澤襲從丞相巴延南征大小十餘戰皆有功

又從平廣西明年收瓊萬諸州拜宣武將軍行軍總管

未幾遷副萬戶加明威將軍從鎮南王托歡伐交趾既

還再舉將校舊嘗往者許留恤之有托歡者當行適病不能起世澤曰吾祖父以武勇稱吾蒙其餘澤荷國厚恩當輸忠王室增光前人豈可苟為自安計耶力請代之凱還人服其義云

張榮

張榮清州人後徙鄆陵歲甲戌從金太保明安降太祖賜虎符授懷遠大將軍元帥左都監乙亥正月奉旨畧東平益都諸郡戊寅領軍匠從太祖征西域諸國庚辰

八月至西域穆稜河不能涉太祖召問濟河之策榮請  
造舟太祖又問舟卒難成濟師當在何時榮請以一月  
為期乃督工匠造船百艘遂濟河太祖嘉其能而賞其  
功賜名烏蘇齊癸未七月陞鎮國上將軍礮水手元帥  
甲申七月從征河西乙酉從征關西五路十月攻鳳翔  
礮傷右髀帝命賜銀三十錠養病于雲內州庚寅七月  
卒年七十三子諾爾布襲佩虎符礮水手元帥領諸色  
軍太祖伐金命由關西小口收金昌州等郡乙未金

亡戊戌授懷遠大將軍癸卯三月陞輔國大將軍甲辰

二月領蒙古漢軍守均州戊申九月宋兵襲均州諾爾  
布拒戰大敗之己酉十一月復與宋兵戰流矢中右  
臂中統三年卒年七十五子君佐襲佩虎符礮水手元  
帥戊蔡州五年都元帥阿珠命將礮手兵攻襄陽至元  
八年調守襄陽一字城橐駝嶺攻南門牛角堡破之攻  
樊城親立礮摧其角樓樊城破十年襄陽降參政阿爾  
哈雅以宋降將呂文煥入朝奉旨召蒙古漢人萬戶凡



二十人陞見各以功受賜帝親諭之令還鎮十一年從軍下漢江至沙洋丞相巴延命率礮手軍攻其北面火礮焚城中民舍幾盡遂破之賜以良馬金鞍金段又以火礮攻陽邏堡破之十二年從大軍與宋將孫虎臣戰于丁家洲復從丞相阿珠攻揚州是年冬又從諸軍破常州十三年陞懷遠大將軍仍礮水手元帥秋君佐屯軍真揚間絕宋糧道宋制置李庭芝都統姜才棄城走揚州平以君佐為安慶府安撫司軍民達嚕噶齊十四

年春安慶野人原及司空山天堂賊將攻安慶君佐密  
察知之時城中軍僅數百人君佐命搃賊出沒要道賊  
不敢入乃寇黃州行省命君佐率衆復黃州因以為黃  
州達嚕噶齊十五年加鎮國上將軍仍礮水手元帥十  
九年命率新附漢軍萬人修膠西閘埧以通漕運二十  
一年兼海道運糧事是年卒

趙天錫

子貴亨

趙天錫字受之冠氏人屬金季兵起其祖以財雄鄉里

為衆所歸貞祐之亂父林保冠氏有功授冠氏丞俄陞  
為令大安末天錫入粟佐軍補修武校尉監洺水縣酒  
太祖遣兵南下防禦使蘇政以為冠氏令乃挈縣人避  
桃源天平諸山歲辛巳春歸行臺東平嚴實實素知天  
錫名遂擢隸帳下從征上黨以功授冠氏令俄遷元帥  
左都監兼令如故甲申宋將彭義斌據大名冠氏元帥  
李全降之人心頗搖天錫令衆姑少避其鋒以圖後舉  
乃率將佐往依大將布爾罕軍未幾破義斌於真定授

左副元帥同知大名路兵馬都總管事李全在大名結其帥蘇椿納金河南從宜鄭倜日以取冠氏為事天錫每戰輒勝一日倜自將萬人來攻天錫率死士乘城力戰三晝夜倜度不能下乘風霾遁去己丑朝行在所上便民事優詔從之戊戌征宋駐兵蘄黃間被病還卒于冠氏年五十子六人賁亨嗣

賁亨字文甫襲行軍千戶己未從國兵渡江攻鄂有功至元五年總管山東諸翼軍征宋攻襄樊賁亨出抄蘄

黃以五百人拔野人原寫山砦修白河新城七年偕元帥劉整朝京師命為征行千戶賜金符及衣帶鞍馬攻樊城冒矢石擁盾先登破之十一年修東西正陽城三月敗夏貴于淮益以濟南汴梁二路新軍十二年正月從攻鎮江與宋將孫虎臣張世傑大戰于焦山殺掠甚衆十三年江南平以功陞宣武將軍十四年授虎符懷遠大將軍處州路總管府達嚕嚕齊未行適盜發澈浦行省檄為招討使率兵平之未幾處州青田縣李文龍

章焱殺趙知府以叛賁亨獲其黨始知七縣俱反李文龍自署為兩浙安撫使據處州天慶觀賁亨率眾圍之將騎士三百陳于下河門賊出戰以精騎蹂之遂棄城突圍散走斬首三級賁亨入城乃招散亡立官府章焱復合二萬眾來攻陣惡溪南賁亨分兵拒守自將精銳亂流衝擊屬萬戶呼圖克台以援兵至自己至亥賊退文龍溺死呼圖克台以處即亂山為州無城可恃且反側欲屠之賁亨曰我受命來監此郡賊固可殺良民

何辜不從將士虜掠子女金帛賁亨捕得倡率者杖之  
仍各求所失還之州民悅服十五年龍泉縣張三八合  
衆二萬殺慶元縣達嚕嚕齊伊遜岱爾且屠其家賁亨  
將騎士五百往討與賊將鄭先鋒陳壽山三千餘人戰  
于浮雲鄉斬首三百餘級三八軍于縣西賊三戰俱敗  
軍還賊衆水陸俱設伏賁亨擇步卒驍悍者使前賊不  
敢近既而衢州賊陳千二聚二萬人遂昌葉丙六亦聚  
三千人助之賁亨前後斬首三千餘級悉平之十七年

改處州路管軍萬戶二十二年還冠氏卒年五十七



元史卷一百五十一

元史卷一百五十一考證

王義傳丁丑大軍南取鉅鹿洺州二城 案胡祗適撰

王義行狀作南取鉅鹿洺州南宮三城

王慶端傳敗李壇于老僧口 案程鉅夫撰王慶端碑

作老鶴口與此異



欽定四庫全書薈要卷六千五百三十一 史部

元史卷一百五十二

明翰林學士亞中大夫知制誥兼修國史宋濂等修

列傳第三十九

張晉亨

好古

張晉亨字進卿冀州南宮人也其兄同知安武軍節度使事領秦強令顥以冀州數道之衆附嚴實于青崖後從實來歸進顥安武軍節度使西征戰沒歲戊寅太師

國王穆呼哩承制署晉亨襲顯爵晉亨涉獵書史小心  
畏慎臨事周密實器之以女妻焉實征澤路偏將李信  
晁海相繼降于宋晉亨跋涉險阻晝伏夜行僅免於難  
實遣子忠貞入質命晉亨與俱丁亥從國王博囉征益  
都以功遷昭毅大將軍領恩州刺史兼行臺馬步軍都  
總領再遷鎮國大將軍實征淮楚河南晉亨畢從甲午  
從實入覲命為東平路行軍千戶圍安慶其守將走邀  
擊之斬首百級俘獲無算攻光之定城俘其將士十有

五人略信陽執復州將金之才攻六安拔之大小數十

戰策功居多實卒其子忠濟奏晉亨權知東平府事東平貢賦率倍他道迎送供億簿書訟獄日不暇給歷七年吏畏而民安之辛亥憲宗即位從忠濟入覲時包銀制行朝議戶賦銀六兩諸道長吏有輒請試行於民者晉亨面責之曰諸君職在親民民之利病且不知乎今天顏咫尺知而不言罪也承命而歸事不克濟罪當何如且五方土產各異隨其產為賦則民便而易足必責

輸銀雖破民之產有不能辦者大臣以聞明日詔見如其言以對帝是之乃得蠲戶額三之一仍聽民輸他物遂為定制欲賜晉亨金虎符辭曰虎符國之名器長一道者所佩臣隸忠濟麾下復佩虎符非制也臣不敢受帝益喜改賜璽書金符恩州管民萬戶中統三年李璫叛晉亨從嚴忠範戰於遙牆灤勝之改本道鄂勒萬戶四年授金虎符分將本道兵充萬戶戍宿州首言汴堤南北沃壤間曠宜屯田以資軍食乃分兵列營以時種

藝選千夫長督勸之事成期年皆獲其利至元八年改  
懷遠大將軍淄萊路總管尋兼軍事十一年詔伐宋晉  
亨在選中間命就道曰此報效之秋也分道由安慶渡  
江丞相巴延留之戍鎮江兼與民政壹以鎮靜為務戰  
焦山瓜洲皆有功十三年卒于官子好古

好古字信甫少讀書善屬文器識宏遠勇而有謀父晉  
亨權知東平府事嚴忠濟承制以好古權其父軍戍宿  
州戊午奏真授行軍千戶攻樊城身中流矢戰不少卻



主將旌其功賞銀百兩略揚循泰興海門而還擊邵伯  
埭拔之從大軍攻鄂中統元年還宿州忠濟命兼恩州  
刺史訪民瘼革吏弊立為條約未幾移戍蘄州李瑄叛  
據濟南宋人攻蘄好古率兵迎擊力不敵死之時晉亨  
在濟南軍中間之哭曰吾兒死得其所矣弟好義龍龔下  
江淮有功

王珍

王珍字國寶大名南樂人世為農家珍慷慨有大志金

末喪亂所在盜起南樂人楊鐵槍聚衆保鄉里太祖遣  
兵攻破河朔鐵槍以兵應之行營帥安扎署珍軍前都  
彈壓鐵槍與金軍戰死衆推蘇椿代領其衆宋將彭義  
斌帥師侵大名椿戰不利降之義斌遂據大名珍棄其  
家間道走還軍中安扎嘉其誠待遇益厚以為假子復  
從蘇勒呼擊走義斌蘇椿以大名降珍妻子故在珍語  
之曰吾非棄汝輩誠不以私愛奪吾報國之心耳聞者  
稱歎授鎮國上將軍大名路治中軍前行元帥府事俄

以取海寧胙城功遷輔國上將軍復授統攝開曹滑濬等處行元帥府事兼大名路安撫使蘇椿復欲叛歸金珍覺之與元帥梁仲先發兵攻椿椿開南門而遁國王烏珍授仲行省珍驃騎衛上將軍同知大名府事兼兵馬都元帥從拉卜台經略河南破金將武仙于鄭州復與金人戰于蕭縣斬其將頃之仲死國王命仲妻冉守真權行省事珍為大名路尚書省下都元帥將其軍國用安據徐邳珍從塔沁額斯倫攻拔之授同簽大名

行省事從軍伐宋破光州秦陽廬壽滁州珍常身先諸將屢有功宋城五河口珍帥死士二十人奪之宋人遁乘勝進師連破濠泗渦口歲庚子入見太宗授總帥北路軍馬管民次官佩金符珍言於帝曰大名困於賦調貸借西域賈人銀八十錠及逋糧五萬斛若復徵之民無生者矣詔官償所借銀復盡蠲其逋糧已而朝廷議分蒙古漢軍戍河南以珍戍睢州修城隍明斥候宋兵不敢犯已酉入朝定宗進本路征行萬戶加金虎符在

鎮九年卒年六十五子文幹善騎射襲為行軍萬戶已未從世祖攻鄂州先登中流矢賜以良馬金帛李壇叛從哈必齊討平之哈必齊論功語以官賞文幹對曰增秩則榮及一身賜金則恩逮麾下迺以白金二千兩罷四百事雜絲數百縑賞之文幹悉頒之軍中中統三年制父兄弟子並仕同塗者罷其弟子文幹弟文禮為千戶文幹自陳願解已官而留文禮詔從之改同知大名路總管府事累遷河東山西道提刑按察副使近臣言

其鄂州之功陞簽東川行樞密院事歷全州衛輝東平  
總管改江東建康道提刑按察使卒于官年五十八發  
其篋中錢僅七緡貧不能歸葬人以此稱之

### 楊濟智格

楊濟智格燕京寶坻人家世業農濟智格少有勇略太  
祖略地燕趙率族屬降附從攻遼左及從元帥額斯倫  
定西夏諸部有功己丑睿宗賜以金幣命從額斯倫攻  
信安額斯倫知其材略出諸將右命裁決軍務信安城

四面阻水其帥張進數月不降濟智格曰彼恃巨浸我師進不得利退不得歸不若往說之進見其來怒曰吾已斬二使汝不懼死耶濟智格無懼色從容言曰今齊魯燕趙地方數千里郡邑聞風納降獨君恃此一城內無軍儲外無援兵亡可立待為君計者不如請降可以保富貴而免死亡進默然曰姑待之凡三往乃降辛卯大名守蘇椿叛討獲之衆議屠城濟智格曰怒一人而族萬家非招來之道也衆是其言由是滑濬等州聞風

納款壬辰師次徐州阻河不得濟濟智格探知有賊兵  
操舟楫伏草澤中率勁卒數人憑河擊之悉奪舟楫衆  
遂得渡獲河南諸郡降人三萬餘戶進攻徐州金將國  
用安拒戰濟智格率百餘騎突入陣中迎擊於後大敗  
之擒一將而還皇太弟國王駐兵河上見之賜名巴圖  
授金符命總管新附軍民乙未太宗特賜濟智格種田  
民戶租賦丁酉從額斯倫攻歸德濟智格麾諸將縛草  
作筏渡濠抵城下梯城先登拔之由是進攻得五州十



縣四堡二寨己亥宋兵至己登歸德城濟智格率衆拒戰敗之率舟師追擊轉戰中流溺死年四十子孝先孝友孝先簽江北淮東道肅政廉訪司事孝友鎮江路總管

劉通

劉通字仲達東平齊河人也初從嚴實來歸繼從收濮曹相潞定陶楚邱實薦于太師穆呼哩以通為齊河總管尋授鎮國上將軍左副都元帥濟南知府德州總管

行軍千戶太宗賜金符陞上千戶宋將彭義斌攻齊河  
城率衆夜登通與六七人鼓譟而進宋人驚懼墜溺死  
者甚衆明日復合圍城三匝通令守陴者植槩如櫛俄  
從撤去宋人懼其向己也大潰義斌僅以數騎免歲丁  
酉遷德州等處二萬戶總管軍民歲丙辰卒子復亨襲  
為行軍千戶從嚴實略安豐通秦淮濠泗蘄黃安慶諸  
州憲宗西征復亨攝萬戶統東平軍馬攻釣魚山苦竹  
寨有功師還兼德州軍民總管中統元年奉旨戍和林

還授虎符進武衛軍副都指揮使李壇叛遣使招復亨  
復亨立斬之時遣兵討賊集濟南乏食復亨盡出其私  
蓄以濟師世祖嘉之賜白金五千兩復亨固辭至元二  
年進左翼侍衛親軍都指揮使四年遷右翼九年加昭  
勇大將軍鳳州等處經略使十年遷征東左副都元帥  
統軍四萬戰船九百征日本與倭兵十萬遇戰敗之還  
招降淮南諸郡邑十二年授昭信路總管十四年遷黃  
州宣慰使十五年改太平路總管俄授鎮國上將軍為

淮西道宣慰使都元帥二十年加奉國上將軍三月卒  
子五人浩澤灃淵淮浩中統四年襲千戶至元八年歿  
于兵澤由近侍出為荆湖北道宣慰使灃知長寧州俱  
蚤卒淵至元十一年佩金符授進義副尉為徐邳屯田  
總管下丁莊千戶九月領兵巡邏泗州至淮河九里灣  
遇宋軍戰勝奪其船三十餘艘十二年三月與宋安撫  
朱煥戰于清河敗之擒十四人奪其輜重九月從右丞  
巴爾默色攻淮安十三年與宋人戰昭信軍南靖平山

俱有功十四年北覲進武略將軍管軍總管十五年從元帥張弘範征閩廣漳韶諸州以功授武德將軍十六年從攻崖山弘範命淵領後翼軍水戰有功十七年進安遠大將軍為副招討二十一年遷潁州副萬戶二十四年從征交趾鎮南王托歡命領水步軍二萬攻萬劫江擒十六人繼攻靈山城賊衆迎敵大敗之師還二十八年捕寇澗東獲其酋長三人三十一年兼領紹興澗江五翼軍守杭州繼以疾免大德十一年卒子無晦至

大元年襲授昭信校尉潁州副萬戶俄進武德將軍延祐五年以病免六年改河南江北行省都鎮撫泰定四年加宣武將軍

岳存

岳存字彥誠大名冠氏人初歸東平嚴實承制授存武德將軍帥府都總領保冠氏會金從宜鄭侗復據大名距冠氏僅三十里遣兵來攻侗不得志復自將萬人合圍其勢甚張存率死士百餘突出西門勇氣十倍金人

退走存追之越境乃還歲己丑從嚴實及武仙戰于彰  
德西敗之遷明威將軍行寇氏主簿明年存率騎兵二  
百步卒三百自彰德北還至開州南與金將張開遇開  
衆萬餘存軍依大林戒其軍曰彼衆我寡不可輕動當  
聽吾鼓聲為節乃命騎士居前步卒次之與敵相去僅  
二十步一鼓作氣無不一當百開衆大潰追二十餘里  
不損一卒而還破河南攻淮漢無役不與辛丑陞本縣  
丞庚戌移治楚邱數年有惠政乙卯告老退休田里中

統三年以疾卒年六十九子天禎襲父職冠氏縣軍民  
彈壓從圍襄樊帥府承制授管軍百戶修立百丈山鹿  
門等堡天禎率銳士冒矢石從樊城東北先登為檣木  
所傷墮地復躡梯以登手刃數人築正陽東西城及於  
鎮江造戰船天禎咸董其役戰焦山平奉化賊錄功陞  
管軍千戶江南平從元帥張弘範覲帝於柳林賜金錦  
銀鞍勒授昭勇大將軍福州路總管平尤溪賊秩滿改  
吉州平永新賊後遷贛州七年遷建康首定救荒之政



民立碑以紀遺愛焉至大二年卒于建康年七十二子果會昌州同知

張子良

懋

張子良字漢臣涿州范陽人金末四方兵起所在募兵自保子良率千餘人入燕薊間耕稼已絕遂聚州人阻水治舟筏取蒲魚自給從之者衆至不能容子良部勒定興新城數萬口就食東平東平守納之久之守棄東平還汴檄子良南屯宿州又南屯壽州夏全劫其民出

雞口李敏據州子良率麾下造敏敏欲害之走歸宿因以宿帥之衆奪全所劫老幼數萬以還全怒連徐邳之軍來攻子良與宿帥斫其營全失其軍符走死揚州時金受重圍於汴聲援盡絕有國用安者圖以漣水之衆入援道阻游兵不能進子良與一偏將晝伏夜行得入汴達用安意金君臣以為自天降也曲賜勞來凡所欲皆如用安請因以徐宿授子良明年子良進米五百石于汴授榮祿大夫總管陝西東路兵馬仍治宿州當是

時令已不行於陝而用安亦卒不得志徐宿之間民無食者出城拾糶穢以食子良嚴兵護之以防抄掠猝遇敵子良被重傷乃率其衆就食泗州泗守閱兵將圖之子良與麾下十數人即軍中生縛其守民不欲北歸者欲走傍郡子良資以舟楫無敢掠其財物歲戊戌率泗州西城二十五縣軍民十萬八千餘口因元帥阿珠來歸太宗命為東路都總帥授銀青榮祿大夫陞京東路行尚書省兼都總帥管領元附軍民進金紫光祿大夫

庚子賜金符自兵興以來子良轉徙南北依之以全活者不可勝計癸丑憲宗命為歸德府總管管領元附軍民中統二年夏四月世祖命為歸德泗州總管降虎符仍管領泗州軍民總管七年罷元管戶隸諸郡縣改授昭勇大將軍大名路總管兼府尹八年卒年七十八贈昭勇大將軍僉樞密院事上輕車都尉追封清河郡侯諡翼敏子二人長懋次亨亨佩金虎符為管軍千戶子與立襲卒子鑑襲

懋字之美未弱冠已有父風侍子良官京東故懋領其衆從丞相阿珠軍立歸德府以其軍鎮之移鎮下邳知歸德府事李壇叛濟南以其兵戍蔡州中統元年宣授泗州軍總把佩金符至元七年擢濟南諸路新軍千戶九年從破襄樊有功十一年丞相巴延南征其行陣以鐸車弩為先而衆軍繼之懋以勇鷲將弩前行凡所過山川道路險阻通梁筏平墜穿安營設伏出納奇計巴延信用之擢為省都鎮撫水陸並進其任甚重師壓臨

安滅宋以其主及母后羣臣北還駐瓜洲巴延命懋往諭淮西夏貴副以兩介將騎士直趨合肥貴出迎設賓禮懋示以逆順禍福辭旨雄厲貴受命頓首上地圖降書馳還報巴延大喜復命行徇鎮東安豐壽春懷遠淮安濠等州郡皆下復使之徧諭列城軍民使知帝之德意十三年懋馳驛至上都巴延上其功宣授懋明威將軍泗州安撫司達魯噶齊十四年改安撫司為總管府置宣慰使以統之拜同知淮西道宣慰司事十六年改

授懷遠大將軍吉州路總管懋惡衣糲食率之以儉慎  
刑平政處之以公新府治設義倉雖能吏不過也部使  
者劉宣躡之凡有所懲治朝至夕報豪強竦然郡萬戶  
蘇良恃勢為暴為之翼者有十虎之目民甚苦之乃上  
其實於憲府盡誅十虎者奪良虎符而黜之民大悅羣  
盜有率衆將白晝劫城者懋聞之率從騎擣其穴縛其  
酋長以歸民之流亡與遠郡之來歸者數千家相率為  
生祠以祀之十七年二月卒年六十三贈昭勇大將軍

龍興路總管上輕車都尉追封清河郡侯諡宣敏子二人文煥以父蔭任承務郎江州路瑞昌縣尹文炳三江河巡檢文煥子珪初為高安縣尹有異政由是擢為江西檢校拜南臺御史繼為江西淮西二道廉訪僉事用能世其家云

### 唐慶

唐慶不知何許人事太祖為管軍萬戶太祖伐金以慶權元帥左監軍歲丁亥賜虎符授龍虎衛上將軍使金



壬辰太宗復以慶為國信使取金質子督歲幣以金曹  
王來見帝於官山七月使慶再往令金主黜帝號稱臣  
金主不聽慶輒以語侵之金君臣遂謀害慶夜半令兵  
入館舍殺慶及其弟山祿興祿并從行者十七人既滅  
金購求慶屍不得厚恤其家賜金五十斤詔官其子仍  
計其家人口給糧以養焉

齊榮顯

齊榮顯字仁卿聊城人父旺金同知山東西路兵馬都

總管榮顯幼聰悟總角與羣兒戲畫地為戰陳端坐指  
揮各就行列九歲代父任為千戶佩金符從外舅嚴實  
來歸屢立戰功攻濠州宋兵背城為陳榮顯薄之所向  
披靡其屬王孝忠力戰中鈞戟榮顯斷戟拔孝忠出復  
逐北入其郛而還主帥察罕壯之賜馬鎧銀器兵趨五  
河口抵大堤榮顯偕數騎前行覘敵值邏騎數十從者  
將退走榮顯曰彼衆我寡若示以怯必為所乘援弓策  
馬射殺兩人乃還進拔五河口陞權行軍萬戶守宿州

墮馬傷股不能復從軍改提領本路課稅又改本路諸軍鎮撫兼提控經歷司值斷事官鈎校諸路積逋官吏往往遭詬辱榮顯從容辦理悉為蠲貸從實入朝授東平路總管府參議兼領博州防禦使時十投下議各分所屬不隸東平榮顯力辯於朝遂止及攻淮南道出東平民間供給費銀二萬錠榮顯詣斷事官懇之得折充賦稅民賴以不困中統元年謁告侍親閑居十年卒

石天祿

石天祿父珪山東諸路都元帥陷金死節見忠義傳天祿襲爵博囉承制授龍虎衛上將軍東平路元帥佩金虎符時宋將彭義斌取大名及中山天祿與布爾罕率兵敗之獲義斌又敗金將武仙屢立戰功丙戌博囉以功奏遷金紫光祿大夫都元帥鎮戍邊隅數與金人戰未嘗敗北壬辰皇太弟圖類南渡河天祿為前鋒戰退金兵奪戰船數艘夜至歸德城下襲其營殺三百餘人金將陳防禦出兵追圍天祿天祿潰圍復戰金兵退走

提兵掠亳及徐所過望風降附癸巳秋九月破考城復

圍歸德冬十二月歸德降甲午入覲改授征行千戶濟

充單州管民總管乙未從扎拉固和爾齊渡淮攻隨

州至襄陽夾河寨戰退宋兵扎拉固和爾齊賞以戰馬

又從攻蘄黃功居其首時詔天祿括戶東平軍民賦稅

並依天祿已括籍冊嚴實不得科收天祿以病不任職

以子興祖襲明年天祿卒年五十四子十人興祖襲千

戶官武略將軍己未從伐宋攻鄂州至元四年繇宿州

率兵抄沿淮諸郡獲宋覘伺者十餘輩統軍司賞馬二十匹銀五百兩錦二十端十二年攻常州為先鋒功在諸將上宋亡第功陞宣武將軍管軍總管戍温州土賊林大年等構亂出兵圍之斬首千餘級招集南溪山寨歸農者三萬餘戶十六年陞顯武將軍佩金虎符十九年七月卒于軍子璉嗣

舒穆魯愛新

舒穆魯愛新特爾格氏歲乙亥率北京等路民萬二千

餘戶來歸太師國王穆呼哩秦授鎮國上將軍御史大

夫從擊蠡州死焉子扎拉仍以御史大夫領黑軍初其

父愛新所將軍皆猛士衣黑為號故曰黑軍歲己卯詔

黑軍分屯真定固安太原平陽濕吉岢嵐間頃之南征

以黑軍為前列與南兵遇于河扎拉大呼馳之陷其陣

渡河再戰盡殪之所過城邑爭先款附長驅擣汴州入

自仁和門收圖籍振旅而還論功黑軍為最及從國王

軍征萬努圍南京城堅如立鐵扎拉命偏將先警其東

北親奮長槊大呼登西南角摧其飛櫓手斬陴卒數十人大軍乘之遂克南京詰旦穆呼哩解錦衣賞之累授真定路達魯噶齊卒于柳城子庫魯默襲職從攻襄樊與從弟都呼立雲梯衝其堞都呼死焉中統三年庫魯默從征李璫先登飛矢中額而卒

劉斌

思敬

劉斌濟南歷城縣人少孤鞠于大父有勇力從濟南張榮起兵為管軍千戶歲壬辰攻河南以功授中翼都統



攻睢陽軍軍杏堆距陳州七十里聞陳整軍於近郊弒  
率衆夜破之又擊走太康守兵擒其將三日太康陷榮  
言於帥額斯倫曰太康之平推其鋒者弒也移屯襄陽  
軍乏食弒知青陵多積穀前阻大澤水深不可涉陳可  
取狀衆難之弒叱之曰彼恃險不我虞取可必也乃率  
百騎夜發獲敵人使道之前行汙澤中五十餘里遇敵  
兵弒捨馬揮槊突敵敗之得其糧數千斛遷官知中外  
諸軍事從攻六安先登破其城癸卯擢濟南推官辛亥

授本道左副元帥乙卯陞濟南新舊軍萬戶移鎮邳州  
宋將憚之己未病謂其子曰居官當廉正自守毋黷貨  
以喪身敗家語畢而逝年六十有二贈中奉大夫參知  
政事護軍彭城郡公諡武莊子思敬

思敬賜名哈巴爾圖襲父職為征行千戶世祖南征從  
董文炳攻臺山寨先登中流矢傷甚帝親勞賜酒易金  
符中統二年授武衛軍千戶從討李璫賜銀六十錠四  
年授濟南武衛軍總管捕盜有功又賜銀千兩至元三

年授懷遠大將軍侍衛親軍左翼副都指揮使四年命築京城八年授廣威將軍西川副統軍佩金虎符九年宋嘉定守臣咎萬壽乘虛攻成都哈巴爾圖邀擊敗之戰于青城宋兵大敗奪所俘二千人還十二年轉同簽行樞密院事復攻嘉定取之瀘敘忠涪諸部及巴縣壽勝龜雲石筍等寨十九族及西南夷五十六部悉來降十三年圍重慶敗宋將張萬得其舟百餘六月瀘州復叛哈巴爾圖妻子沒焉乃率兵討擒其將任慶攻破盤

山寨俘九千餘戶又獲其將劉雄及王世昌等夜入東門巷戰殺王安撫等遂克瀘州復攻重慶其將趙牛子降禽守臣張珏十六年蜀平拜中奉大夫四川行省叅知政事行省罷改四川北道宣慰使十七年授正奉大夫江西行省叅知政事治吉贛盜民賴以安二十年卒年五十三贈推忠宣力果毅功臣平章政事柱國封濱國公諡忠肅子思恭字安道累官昭毅大將軍右衛親軍都指揮使思義宣武將軍昌國州軍民達魯噶齊

# 趙柔

趙柔涑水人有膽略善騎射好施予金未避兵西山柵險以保鄉井時劉伯元蔡友資李純等亦各聚衆數千聞柔信義共推為長柔明號令嚴約束重賞罰為衆所服歲癸酉太祖遣兵破紫荆關柔以其衆降行省巴扎奏聞以柔為涑易二州長官佩金符丙戌羣盜並起柔單騎徧入諸寨說降其衆以功遷龍虎衛上將軍真定涿等路兵馬都元帥佩金虎符兼銀冶總管庚寅太宗

命兼管諸處打捕總管丙申加金紫光祿大夫卒至順  
元年追封天水郡公諡莊靜曾孫世安榮祿大夫江西  
行省左丞



元史卷一百五十二



總校官編修臣吳紹深



欽定四庫全書薈要

史部

元史卷一百五十三至  
六



詳校官編修臣王天祿

欽定四庫全書蒼要卷六千五百三十二 史部

元史卷一百五十三

明翰林學士亞中大夫知制誥兼修國史宋濂等修

列傳第四十

劉敏

劉敏字有功宣德青魯人歲壬申太祖師次山西敏時年十二從父母避地德興禪房山兵至父母棄敏走大將憐而收養之一日帝宴諸將於行營敏隨之入帝見



其貌偉異之召問所自俾留宿衛習國語閱二歲能通諸部語帝嘉之賜名諤楚肯出入禁闥初為奉御帝征遼西諸國破之又征回回國破其軍二十萬悉收其地敏皆從行癸未授安撫使便宜行事兼燕京路徵收稅課漕運鹽場僧道司天等事給以西域工匠千餘戶及山東山西兵士立兩軍戍燕置二總管府以敏從子二人佩金符為二府長命敏總其役賜玉印佩金虎符奏佐吏宋元為安撫副使高逢辰為安撫僉事各賜銀章

佩金符李臻為參謀初耶律楚材總裁都邑契丹人居  
多其徒往往中夜挾弓矢掠民財官不能禁敏戮其渠  
魁令諸市又豪民冒籍良民為奴者衆敏悉歸之選民  
習星厯者為司天太史氏興學校延名士為之師己丑  
太宗即位改造行宮幄殿乙未城和林建萬安宮設宮  
闈司局立驛傳以便貢輸既成宴賜甚渥辛丑春授行  
尚書省詔曰卿之所行有司不得與聞俄而伊囉斡齊  
自西域回奏與敏同治漢民帝允其請伊囉斡齊素剛

尚氣恥不得自專俾其屬莽鳴爾誣敏以流言敏出手  
詔示之乃已帝聞命呼爾察和爾齊中書左丞鈕祜祿  
重山奉御李簡詰問得實罷伊囉斡齊仍令敏獨任復  
辟李臻為左右司郎中臻在幕府二十年參贊之力居  
多丙午定宗即位詔敏與溫都爾同行省事辛亥夏六  
月憲宗即位召赴行在所仍命與伊囉斡齊同政甲寅  
請以子世亨自代帝許之賜世亨銀章佩金虎符賜名  
多托爾台帝諭世亨不從命者黜之又賜其子世濟名沙

卜珠丹為筆且齊入宿衛帝伐宋幸陝右敏輿疾請見  
帝曰卿有疾不召而來將有言乎敏曰臣聞天子出巡  
義當扈從敢辭疾乎但中原土曠民貧勞師遠伐恐非  
計也帝弗納敏還退居年豐世祖南征過年豐敏入見  
諭之曰我太祖勵精圖治見而知者惟卿爾汝春秋高  
其彙次以為後法未幾病歸于燕夏四月卒年五十九

王檝

王檝字巨川鳳翔縣人父寔金武節將軍麟游主簿

檄性倜儻弱冠舉進士不第乃入終南山讀書涉獵孫  
吳泰和中復下第詣闕上書論當世急務金主俾給事  
經實元帥府尋用元帥高琪薦特賜進士出身授副統  
軍守涿鹿隘太祖將兵南下檄鏖戰三日兵敗見執將  
戮之神色不變太祖問曰汝曷敢抗我師獨不懼死乎  
對曰臣以布衣受恩誓捐軀報國今既僨軍得死為幸  
帝義而釋之授都統佩以金符令招集山西潰兵從大  
軍破紫荆關取涿易保州中山軍次雄州節度使孫吳

堅守不下檄入城喻以禍福吳遂以城降甲戌授宣撫使兼行尚書六部事從僧格巴圖太傅明安率兵南征下古北口攻薊雲順等州所過迎降得漢軍數萬遂圍中都乙亥中都降檄進言曰國家以仁義取天下不可失信於民宜禁虜掠以慰民望時城中絕粒人相食乃許軍士給糧入城轉糶故士得金帛而民獲粒食又議田野久荒而兵後無牛宜差官盧溝橋索軍回所驅牛十取其一以給農民用其說得數千頭分給近縣民大



悅復業者衆僧格明安俾檄招諭保定新城信安雄霸  
文安清滄諸城皆望風款附乃置行司于滄州以鎮之  
遂從明安入覲授銀青榮祿大夫仍前職兼御史大夫  
世襲千戶時河間清滄復叛帝命檄討之復命駙馬巴  
圖分蒙古軍及紂漢軍三千屬檄遂復河間得軍民萬  
口巴圖惡其反覆欲盡誅之檄解之曰驅羣羊使東西  
者牧人也羊何知哉殲其渠魁足矣釋此輩遷之近縣  
强者使從軍弱者使為農此天之所以畀我也何以殺

為巴圖曰汝能保此輩不復反耶檄曰可即移文保任之俱得全活帝命實里巴與皇太弟國王分撥諸侯王城邑諭實里巴曰漢人中若王宣撫者可任使之遂以前職兼判三司副使後又命省臣總括歸附工匠之數將俾大臣分掌之太師阿哈具列諸大臣名以聞帝曰朕有其人偶忘姓名耳良久曰得之矣舊人王宣撫可任是職遂命檄掌之時都城廟學既燬於兵檄取舊樞密院地復創立之春秋率諸生行釋菜禮仍取舊岐陽

石鼓列廡下丙戌從征西夏及秦州夏人盡撤橋梁為  
備軍阻不得前帝問諸將皆不知計所出檄夜督士卒  
運木石比曉橋成軍乃得進戊子奉監國公之命領省  
中都屬盜起信安結北山盜李密轉掠近縣檄曰都城  
根本之地何可無備引水環城調度經費檄自為券假  
之賈人而斂不及民人心稍安遣男守謙率軍討諸盜  
平之庚寅從征關中長驅入京兆進克鳳翔請于太宗  
曰此臣鄉邦也願入城訪求親族果得族人數十口以

歸壬辰從攻汴京癸巳奉命持國書使宋以鄂囉羅副  
之至宋宋人甚禮重之即遣使以金幣入貢檝前後凡  
五往以和議未決隱憂致疾卒于南宋人重賙之仍遣  
使歸其柩葬于燕子六人

### 王守道

王守道字仲履其先真定平山人金亡羣盜並起州縣  
吏多乘亂貪暴不法民往往殺令丞及屬吏宣撫司署  
守道為縣尉衆悅之因轉攝令改真定主簿史天倪為

河北西路兵馬都元帥鎮真定既收大名澤潞懷孟城  
邑之未附者以為府經歷及金恒山公武仙降署為史  
天倪副帥守道謂天倪曰是人位居公下意有不平安  
能鬱鬱於此宜先事為備天倪不以為然未幾果為所  
害及仙以城反為金史氏之人與屬縣旁近豪傑納天  
倪之弟天澤為主帥攻仙時史天安在白霄聞變率兵  
亦至遂復真定仙走保西山諸砦執守道家人以重幣  
誘之守道不顧日與史氏部曲昆弟徵發調度以復讐

卒逐仙遁去後擢慶源軍節度使天澤為五路萬戶署  
守道行軍參謀兼檢察使莊聖太后以真定為湯沐邑  
守道在鎮以幕寮頻歲致覲敷對稱旨得賜金符錦衣  
金錢中統三年天澤入拜左丞相即授真定等路萬戶  
府叅謀至元七年卒至大元年以子顥貴特贈銀青榮  
祿大夫大司徒追封壽國公諡忠惠仁宗即位復加推  
忠協力秉義功臣金紫光祿大夫大司徒上柱國

## 高宣

高宣遼陽人太宗元年詔宣為元帥賜金符統兵從睿宗攻大名宣進曰今奉命出師伐罪弔民願勿嗜殺以稱上意睿宗召元帥綽諾諭之下令軍中如宣言及城破兵不血刃民心悅服四年正月從破金兵三峯山降宣者三千餘戶籍以獻立打捕鷹坊都總管府統之以宣為都總管賜金符仍令子孫世其職卒皇慶二年贈宣力功臣銀青榮祿大夫大司徒追封營國公諡簡僖子天錫事世祖潛邸為筆且齊入宿衛甚見親幸中統

二年授以其父官為鷹坊都總管四年改燕京諸路鄂  
囉總管遷按察副使仍兼鷹坊都總管天錫語丞相博  
囉左丞張文謙曰農桑者衣食之本不務本則民衣食  
不足教化不可興古之王政莫先於此願留意焉丞相  
以聞帝悅命立司農司以天錫為中都山北道巡行勸  
農使兼司農丞尋遷司農少卿巡行勸農使又遷戶部  
侍郎進嘉議大夫兵部尚書卒後贈推忠保義功臣太  
保儀同三司上柱國追封營國公諡莊懿子諒裕宗初



封燕王以諒為符寶郎俄命襲其父官為鷹坊都總管

裕宗甚愛之謂符寶郎董文忠曰汝為我奏請以諒所

管民戶隸於我庶得諒盡力為我用文忠入奏帝從之

未幾授諒嘉議大夫遷兵部尚書卒仁宗時贈推誠保

德贊治功臣太師開府儀同三司上柱國追封營國公

諡宣靖子塔斯布哈成宗命世其祖父官以居喪辭大

德元年授奉議大夫章佩監丞四年改朝列大夫利用

監丞八年陞少監武宗即位授中議大夫秘書監丞仁

宗居東宮召入宿衛至大三年冬遷少中大夫納綿府  
達嚕噶齊且諭之曰此先世所守舊職也皇慶元年春  
改授嘉議大夫同知崇祥院事冬進資德大夫為院使  
延祐四年夏四月帝謂塔斯布哈曰汝祖嘗為司農今  
復以授汝遂遷榮祿大夫大司農英宗居東宮塔斯布  
哈撰集前代嘉言善行名曰承華事略并畫豳風圖以  
進帝覽之獎諭曰汝能輔太子以正朕甚嘉之命置圖  
書東宮俾太子時時觀省六年改集禧院使退居于家

卒

王玉汝

王玉汝字君璋鄆人少習吏事金末遷民南渡玉汝奉其親從間道還行臺嚴實入據鄆署玉汝為掾史稍遷補行臺令史中書令耶律楚材過東平竒之版授東平路奏差官以事至京師遊楚材門待之若家人父子然實年老艱於從戎玉汝奏請以本府總管代之行夏津災玉汝奏請復其民一歲濟州長官欲以州直隸朝廷

大名長官欲以冠氏等十七城改隸大名玉汝皆辨正之戎戎以東平地分封諸勲貴裂而為十各私其入與有司無相關玉汝曰若是則嚴公事業存者無幾矣夜靜哭於楚材帳後明日召問其故曰玉汝為嚴公之使今嚴公之地分裂而不能救止無面目還報將死此荒寒之野是以哭耳楚材惻然良久使詣帝前陳懇玉汝進言曰嚴實以三十萬戶歸朝廷崎嶇兵間三棄其家室卒無異志豈與他降者同今裂其土地析其人民非

所以旌有功也帝嘉玉汝忠款且以其言為直由是得  
不分遷行臺知事仍遙領平陰令辛丑實子忠濟襲職  
授左右司郎中遂總行臺之政分封之家以嚴氏總握  
其事頗不自便定宗即位皆聚闕下復欲剖分東平地  
是時衆心危疑將俛首聽命玉汝力排羣言事遂已憲  
宗即位有旨令常賦外歲出銀六兩謂之包垛銀玉汝  
曰民力不支矣糾率諸路管民官愬之闕下得減三分  
之一累官至龍虎衛上將軍泰定軍節度使兼兗州管

內觀察使充行臺叅議壬子以病謝事杜門日以經史自娛乙卯忠濟使人謂玉汝曰君閒久矣可暫起為吾分憂玉汝堅辭以叅議印強委之不得已起視事僅五六日裁畫署置煥然一新八月既望有星隕庭中已而玉汝卒

焦德裕

焦德裕字寬父其遠祖贊從宋丞相富弼鎮瓦橋關遂為雄州人父用仕金由東鹿令陞千戶守雄州北門太

祖兵至州人開南門降用猶力戰遂生獲之帝以其忠壯釋不殺復舊官徇地山東未嘗妄殺一人年六十二卒後以德裕貴追贈中書左丞封恒山郡公諡正毅德裕通左氏春秋少拳勇善射從其舅解昌軍中金將武仙殺真定守史天倪仙既敗走其黨趙貴王顯齊福等保仙故壘數侵掠太行太宗擇廷臣有才辯者往招之楊惟中以德裕薦遂使真定降齊福擒趙貴王顯亡走德裕追射殺之其地悉平詔賜井陘北障城田中統三

年李壇平世祖命德裕曲赦益都四年賜金符為閬蓬等處都元帥府參議宋臣夏貴圍宣撫使張庭瑞于虎嘯山實薪土塞水源人無從得飲帥府檄德裕援之德裕夜薄貴營令卒各持三炬貴驚走追及鵝谿馘千人獲馬畜兵仗萬計陞京畿漕運使至元六年僉陝西道提刑按察使事八年轉西夏中興道按察副使十一年從丞相巴延南征授僉行中書省事遂從下安慶至鎮江焦山寺主僧誘居民叛丞相阿珠既誅其魁欲盡阮



其徒德裕諫止之命德裕先入城撫定宋平賜予有加奉旨求異人異書平章阿哈瑪特譖丞相巴延殺丁家洲降卒事奏以德裕為中書叅政欲假一言證成之德裕辭不拜久之僉行省事十四年改淮東宣慰使淮西賊保司空山檄淮東四郡守為應元帥特爾格邏得其檄械郡守許定國等四人使承反狀將籍其家德裕言四人者皆新降將天子既寵綏之有地有民盈所望矣方誓報効安有他覲柰何以疑似殺四守寧知非反間

耶盡復其官拜福建行省叅知政事二十五年卒年六十九贈榮祿大夫平章政事追封恒國公諡忠肅子簡餘姚州知州潔信州治中

石天麟

石天麟字天瑞順州人年十四入見太宗因留宿衛天麟好學不倦於諸國書語無不習帝命中書令耶律楚材釐正庶務選賢能為叅佐天麟在選賜名孟古岱宗王征西域以天麟為斷事官憲宗六年遣天麟使海都

拘留久之既而邊將劫皇子北安王以往寓天麟所天麟稍與其用事臣相親狎因語以宗親恩義及臣子逆順禍福之理海都聞之悔悟遂遣天麟與北安王同歸天麟被拘留二十八年始得還世祖大悅賞賚甚厚拜中書左丞兼斷事官天麟辭曰臣奉使無狀陛下幸赦弗誅何可復叨榮寵况臣才識淺薄年力衰憊豈能任政恐徒貽廟堂羞不敢奉詔帝嘉其誠褒慰良久從之有譖丞相安圖嘗受海都官爵者帝怒天麟奏曰海都

寔宗親偶有違言非仇敵比安圖不拒絕之所以釋其  
疑心導其臣順也帝怒乃解江南道觀偶藏宋主遺像  
有僧素與道士交惡發其事將置之極刑帝以問天麟  
對曰遼國主后銅像在西京者今尚有之未聞有禁令  
也事遂寢天麟年七十餘帝以所御金龍頭杖賜之曰  
卿年老出入宮掖杖此可也時權臣用事凶焰薰炙人  
莫敢言天麟獨言其姦無所顧忌人服其忠直成宗即  
位加榮祿大夫司徒大宴玉德殿召天麟與宴賜以御

藥命左右勸之酒頗醉命御輦送還家武宗即位進平  
章政事至大二年秋八月卒年九十二贈推誠宣力保  
德翊戴功臣開府儀同三司太師上柱國追封冀國公  
諡忠宣子珪累官治書侍御史遷樞密副史復為侍御  
史拜河南行中書省右丞陞榮祿大夫南臺御史中丞  
卒次子輝圖初襲斷事官累遷刑部尚書荆湖北道宣  
慰使孫哈喇齊襲斷事官

李邦瑞

李邦瑞字昌國以字行京兆臨潼人世農家邦瑞幼嗜學讀書通大義嘗被掠逃至太原為金將小史從守伊瑪山寨國王穆呼哩攻下諸城堡金將走邦瑞率衆來歸復居太原守臣惜其材具鞍馬遣至行在所中書以其名聞歲庚寅受旨使宋至寶應不得入未幾命復往仍諭山東淮南路行尚書省李全護送宋仍拒之復奉旨以行邦瑞道出蘄黃宋遣賤者來迎邦瑞怒叱出之宋改命行人乃議如約而還太宗慰勞賜車騎旃裘衣

裝及銀十錠邦瑞因奏干戈之際宗族離散乞歸尋訪  
帝諭蘇布特察罕實喇達海等邦瑞馳驛南京詢訪親  
戚或以隸諸部者悉歸之甲午從諸王庫春經略河南  
凡所歷河北陝西州郡四十餘城繪圖以進授金符宣  
差軍儲使乙未夏六月卒子榮

楊真

楊真字煥然乾州奉天人母嘗夢東南日光射其身旁  
一神人以筆授之已而真生其父以為文明之象因名

之曰真年十一母歿哀毀如成人金末舉進士不中乃  
作萬言策指陳時病皆人所不敢言者未及上而歸教  
授鄉里歲癸巳金元帥崔立以汴京降真微服北渡冠  
氏帥趙壽之即延致真待以師友之禮門人有自京師  
載書來者因得聚而讀之東平嚴實聞真名數問其行  
藏真終不一詣戊戌太宗詔宣德稅課使劉用之試諸  
道進士真試東平兩中賦論第一從監試官北上謁中  
書耶律楚材楚材奏薦之授河南路徵收課稅所長官



兼廉訪使與將行言於楚材曰僕不敏誤蒙不次之用以書生而理財賦已非所長又况河南兵荒之後遺民無幾烹鮮之喻正在今日急而擾之糜爛必矣願假以歲月使得撫摩瘡痍以為朝廷愛養基本萬一之助楚材甚善之與既至招致一時名士與之議政事約束一以簡易為事按行境內親問監務月課幾何難易若何有以增額言者與責之曰剝下欺上汝欲我為之耶即減元額四之一公私便之不踰月政成時論翕然以為

前此漕司未之有也在官十年乃請老于燕之行臺壬子世祖在潛邸驛召與參議京兆宣撫司事累上書得請而歸乙卯疾篤處置後事如平時引觴大笑而卒年七十賜諡文憲與博覽強記作文務去陳言以蹈襲古人為恥朝廷諸老皆折行輩與之交關中雖號多士名未有出與右者與不治生產家無十金之業而喜周人之急雖力不贍猶勉強為之人有片善則委曲稱獎唯恐其名不聞或小過失必盡言勸止不計其怨怒也所

著有還山集六十卷大興近鑑三卷正統書六十卷行于世

賈居貞

賈居貞字仲明真定獲鹿人年十五汴京破奉母居天平甫冠為行臺從事時法制未立人以賄賂相交結有餽黃金五十兩者居貞卻之太宗聞而嘉歎勅有司月給白金百兩以旌其廉世祖在潛邸知其賢召用之俾監築上都城訖事以母喪歸世祖即位中統元年授中

書左右司郎中從帝北征每陳說資治通鑑雖在軍中未嘗廢書一日帝問郎俸幾何居貞以數對帝謂其太薄勅增之居貞辭曰品秩宜然不可以臣而紊制劉秉忠奏居貞為叅知政事又辭曰他日必有由郎官援例求執政者將何以處之不拜至元元年叅議中書省事詔與左丞姚樞行省河東山西罷侯置守五年再為中書郎中阿哈瑪特擅權忌之改給事中同丞相史天澤等纂修國史十一年丞相巴延伐宋居貞以宣撫使議

行省事既渡江下鄂漢巴延以大軍東下留左丞阿爾  
哈雅與居貞分省鎮之居貞曰江陵要地乃宋制閩重  
兵所屯聞諸將不睦遷徙之民盈城復皆疾疫芻薪乏  
闕杜門不敢樵採不乘隙先取之迨春水漲恐上流為  
彼所乘則鄂危矣驛聞十二年春命阿爾哈雅領兵取  
江陵居貞以僉行省事留鄂於是發倉粟以賑流亡宋  
宗室子孫流寓者廩食之不變其服而行其楮幣東南  
未下州郡商旅留滯者給引以歸之免括商稅并湖荻

禁造舟百數艘駕以水軍不致病民一方安之婁安邦以信陽來歸遣入覲裨將陳思聰屠其家居貞以計召至數思聰罪而誅之宋幼主既降其相陳宜中等挾二王逃閩廣所在扇惑民爭應之蘄州寇起司空山屬縣民傅高亦起兵應居貞移檄諭以禍福其下往往渙散壓以官軍遂削平之高變姓名逃逸獲而戮之初遣鄭萬戶討賊鄭言鄂之大姓皆與傅高通請先除之以絕禍本居貞曰高鼠子無知行就戮矣大姓何預吾能保

其無他鄭既領兵出留其所善部將戒曰聞吾還軍汝  
即舉烽城樓內外合發當盡殺城中大姓會其人戰敗  
溺死其事始彰十四年拜湖北宣慰使命未下居貞閉  
門不出而驕將悍卒合謀擾民乃復出視事人恃以無  
恐及行鄂之老幼號送于道刻其像于石祠之泮宮十  
五年遷江西行省叅知政事未至民爭千里迎訴時逮  
捕民間受宋二王文帖者甚急坐繫巨室三百餘居貞  
至悉出之投其文帖于水火士卒有挾兵入民家誣為

藏匿以取財者取人子女為僕妾者皆痛繩以法大水  
壞民廬居貞發廩賑之南安李梓發作亂居貞慮將帥  
出兵擾民請親往卒纔千人營于城北遣人諭之賊眾  
聞居貞至皆散匿不復為用梓發閉妻子一室自焚死  
此還不戮一人杜萬一亂都昌居貞調兵擒之有列巨  
室姓名百數來上云與賊連居貞曰元惡誅矣蔓延何  
為命火其牒十七年朝廷再征日本造戰艦于江南居  
貞極言民困如此必致亂將入朝奏罷其事未行以疾



卒于位年六十三贈推忠輔義功臣銀青榮祿大夫中書平章政事追封定國公仲子鈞

鈞字元播幼讀書淵默有容由權茶提舉拜監察御史僉淮東廉訪司事行臺都事入為刑部郎中改右司郎中參議中書省事仁宗即位拜參知政事議罷尚書省所立法遷僉書樞密院復參知政事賜錦衣寶帶寵賚有加為政持大體風裁峻整不子子鈞名譽皇慶元年從幸上都遇疾卒于家前後詔賻鈔三萬貫供葬事子

汝立嗣

元史卷一百五十三